

Na osnovu člana 37. stav 1. tačka f) Ustava Zeničko-dobojskog kantona, i člana 32. Zakona o izmjenama i dopunama Zakona o zaštiti i spašavanju ljudi i materijalnih dobara od prirodnih i drugih nesreća (“Službene novine Federacije Bosne i Hercegovine”, broj: 43/10), Skupština Zeničko-dobojskog kantona na 6. sjednici održanoj dana 04.05.2011. godine, donosi

Z A K O N
o Kantonalnoj upravi civilne zaštite
(„Službene novine Zeničko-dobojskog katnona“ broj 7/04, 5/08 i 6/11)

I – OPĆE ODREDBE

Član 1.

Ovim Zakonom osniva se Kantonalna uprava civilne zaštite (u daljem tekstu: Uprava) kao samostalna uprava Zeničko-dobojskog kantona (u daljem tekstu: Kanton).

II – SJEDIŠTE UPRAVE

Član 2.

Sjedište Uprave je u Zenici.

III – DJELOVANJE I NADLEŽNOST

Član 3.

Uprava obavlja upravne, stručne i druge poslove iz područja zaštite i spašavanja i zaštite od požara i vatrogastva u nadležnosti Kantona, na način kako je to regulisano članom 28. Zakona o zaštiti i spašavanju ljudi i materijalnih dobara od prirodnih i drugih nesreća (“Službene novine Federacije BiH, broj 39/03, 22/06 i 43/10, u daljem tekstu: Zakon o zaštiti) i članom 15. Zakona o zaštiti od požara i vatrogastvu (“Službene novine Federacije BiH”, broj: 64/09), u daljem tekstu: Zakon o zaštiti od požara i vatrogastvu, a naročito:

1. organizuje, priprema i prati funkcioniranje zaštite i spašavanja na području Kantona;
2. izrađuje procjenu ugroženosti za područje Kantona, u saradnji sa kantonalnim ministarstvima i drugim kantonalnim organima uprave;
3. priprema program razvoja zaštite i spašavanja od prirodnih i drugih nesreća Kantona;
4. predlaže plan zaštite od prirodnih i drugih nesreća Kantona;

5. Priprema Plan zaštite od požara Kantona, u saradnji sa kantonalnim ministarstvima;
6. predlaže godišnji plan aktivnosti na realizaciji zadataka utvrđenih za zaštitu od požara i vatrogastvo;
7. predlaže plan korištenja sredstava ostvarenih po osnovu posebne naknade za zaštitu od prirodnih i drugih nesreća u Kantonu;
8. izrađuje Plan deminiranja za područje Kantona;
9. koordinira poslove u oblasti deminiranja i uklanjanje neeksplozivnih ubojnih sredstava na području Kantona;
10. prati stanje priprema zaštite i spašavanja i predlaže mjere za unapređenje organizacije i osposobljavanja civilne zaštite Kantona i općina;
11. organizuje i prati realiziranje obuke nositelja civilne zaštite;
12. organizuje i koordinira provedbu mjera zaštite i spašavanja, te organizuje i provodi poslove zaštite od požara i vatrogastvo;
13. organizuje Kantonalni operativni centar civilne zaštite (u daljem tekstu: Operativni centar) i obezbjeđuje njegov rad;
14. predlaže programe zajedničkih i samostalnih vježbi i izradu elaborata za vođenje vježbi pripadnika civilne zaštite, tijela uprave, privrednih društava i drugih pravnih osoba iz područja zaštite i spašavanja;
15. predlaže i preduzima mjere za popunu ljudstvom štaba, jedinica civilne zaštite i službi zaštite i spašavanja, te njihovo opremanje materijalno-tehničkim sredstvima;
16. obavlja stručne, administrativne, tehničke i druge poslove za rad Kantonalnog štaba civilne zaštite Zeničko-dobojskog kantona (u daljem tekstu: Kantonalni štab);
17. priprema propise iz područja zaštite i spašavanja u nadležnosti Kantona;
18. organizira i provodi obuku stanovništva i pruža pomoć službama civilne zaštite općina u obavljanju poslova u njihovoj nadležnosti;
19. obavlja inspekcijski nadzor iz područja zaštite i spašavanja i zaštite od požara i vatrogastva, te upravni nadzor u skladu sa članom 143. i 144. Zakona o zaštiti od požara i vatrogastvu;
20. vodi drugostepeni postupak kod utvrđivanja sposobnosti građana za učešće u zaštiti i spašavanju;
21. formira drugostepenu ljekarsku komisiju radi utvrđivanja sposobnosti građana za učešće u zaštiti i spašavanju;
22. odlučuju o pravu na jednokratnu pomoć za pripadnike civilne zaštite koji su po odluci i vlade kantona o proglašenju prirodne i druge nesreće angažovani od strane Kantonalne uprave ili Kantonalnog štaba.
23. vodi propisane evidencije i obavlja druge poslove zaštite i spašavanja, u skladu sa zakonom, drugim propisima i općim aktima.

IV – ORGANIZACIJA UPRAVE

Član 4.

Organizacija Uprave utvrđuje se na način da se osigurava zakonito, stručno, racionalno i efikasno obavljanje poslova zaštite i spašavanja ljudi i materijalnih dobara od prirodnih i drugih nesreća, a naročito obuhvata programiranje, planiranje, organiziranje,

koordiniranje, obučavanje i osposobljavanje, provođenje, nadzor i finansiranje mjera i aktivnosti za zaštitu i spašavanje od prirodnih i drugih nesreća s ciljem sprečavanja opasnosti, smanjenja broja nesreća i žrtava, te otklanjanja i ublažavanje štetnih djelovanja i posljedica prirodnih i drugih nesreća, na području Kantona.

Za obavljanje stručnih i drugih poslova koji se odnose na organizovanje, funkcionisanje i praćenje stanja zaštite od požara i vatrogastva na području Kantona u Upravi se osniva organizaciona jedinica za zaštitu od požara i vatrogastvo.

U sastavu Uprave funkcioniše Operativni centar radi stalnog prikupljanja podataka o svim vrstama pojava i opasnosti koje mogu dovesti do prirodne ili druge nesreće, kao i podataka o posljedicama koje su nastale po ljude i materijalna dobra na ugroženom području, obradu tih podataka i njihove distribucije nadležnim organima vlasti i pravnim licima, kao i prenošenja naredbi Kantonalnog štaba u vrijeme njegovog funkcioniranja

Organizacija Uprave utvrdit će se pravilnikom o unutrašnjoj organizaciji.

V- RUKOVOĐENJE UPRAVOM

Član 5.

Upravom rukovodi direktor Uprave.

Direktor rukovodi, koordinira i nadzire aktivnosti uprave.

Izvršava federalne i kantonalne zakone i propise iz okvira nadležnosti Uprave.

Izvršava poslove koje mu odredi Vlada Zeničko-dobojskog kantona (u daljem tekstu: Vlada) i premijer Kantona.

Obavlja i druge poslove utvrđene zakonom i odgovoran je za obavljanje svih poslova iz nadležnosti Uprave.

Direktor za svoj rad i upravljanje odgovara Vladi .

VI – RADNI ODNOSI

Član 6.

Na službenike i namještenike Uprave primjenjuju se propisi koji važe za službenike u tijelima uprave Federacije i Kantona, ako ovim zakonom nije drugačije propisano.

Član 7.

Kada to zahtijevaju potrebe službe (dežurstva, obuka i vježbe, provjeru pripravnosti štaba, jedinica i službi civilne zaštite, akcije zaštite i spašavanja, te drugi neodgodivi poslovi) službenici i namještenici Uprave dužni su te poslove obavljati i duže od punog radnog vremena. Izuzetno, u uslovima elementarnih nepogoda i drugih nesreća zbog posebnih uvjeta rada sredstva za plaće rukovodilaca, službenika i namještenika Kantonalne uprave mogu biti uvećana do 20%.

VII – ODNOSI PREMA DRUGIM TIJELIMA KANTONALNE UPRAVE

Član 8.

U vršenju poslova iz svoje nadležnosti Uprava je dužna vršiti:

1. koordinaciju, podsticati i usmjeravati aktivnosti svih kantonalnih organa uprave na izvršavanju poslova zaštite i spašavanja iz njihove nadležnosti.

2. ostvarivati odgovarajuću saradnju sa službama civilne zaštite općina na području kantona i podsticati i usmjeravati njihove aktivnosti na izvršavanju poslova zaštite i spašavanja iz njihove nadležnosti i službama pružati odgovarajuću pomoć.

3. provoditi instrukcije Federalne uprave civilne zaštite za vršenje federalne politike, zakona i drugih federalnih propisa iz oblasti zaštite i spašavanja ljudi i materijalnih dobara.

VIII – FINANSIRANJE I OPREMANJE

Član 9.

U budžetu Kantona osiguravaju se potrebna finansijska sredstva za:

1. opremanje, finansiranje, obučavanje i rad Uprave,

2. pripremanje, opremanje i obuku Kantonalnog štaba, službi zaštite i spašavanja, operativnog centra, centra za obuku i jedinica civilne zaštite koje formira Kanton, te troškova koji nastaju tokom njihovog učešća u provođenju mjera zaštite i spašavanja po naredbi Kantonalnog štaba civilne zaštite,

3. opremanje i osposobljavanje privrednih društava i drugih pravnih osoba u dijelu kada postavljeni zadaci tim društvima objektivno nadilaze njihove materijalne mogućnosti,

4. smanjenje dijela šteta nastalih prirodnom ili drugom nesrećom, u skladu sa materijalnim mogućnostima,

5. istraživačke i razvojne projekte od značaja za ustrojavanje i provođenje zaštite i spašavanja od prirodnih i drugih nesreća,

6. obuku stanovništva,

7. prema potrebi, pružanje finansijske potpore općinama u ostvarivanju njihovih zadataka zaštite i spašavanja, a naročito za opremanje i obuku općinskih štabova civilne zaštite, službi zaštite i spašavanja, jedinica civilne zaštite, operativnih centara civilne zaštite, pomoći pri saniranju posljedica prirodnih i drugih nesreća i udruživanju sredstava posebne naknade općinama, kantonima i Federacijom u zajedničkim projektima razvoja sistema zaštite i spašavanja.

8. druge potrebe zaštite i spašavanja, u skladu sa zakonom i drugim propisima.

Sredstva ostvarena po osnovu posebne naknade služe isključivo za namjene iz stava 1. tačke 2. do tačke 7. ovog člana kako je propisano članom 180. stav 4. i članom 183. Zakona o zaštiti, a sredstva ostvarena iz premija osiguranja za vatrogasnu djelatnost za namjene iz člana 137. Zakona o zaštiti od požara i vatrogastvu.

Korištenje sredstava iz stava 2. ovog člana i sredstava osiguranih u Budžetu Kantona za zaštitu i spašavanje i zaštitu od požara i vatrogastvo, vrši se na osnovu potreba koje su obrazložene u Programu razvoja i godišnjem planu realizacije Programa razvoja u skladu sa članom 183. Zakona o zaštiti i članom 19. Zakona o zaštiti od požara i vatrogastvu, na prijelog Uprave.

IX – INSPEKCIJSKI NADZOR

Član 10.

Uprava, u okviru svoje nadležnosti, obavlja poslove inspekcijskog nadzora, koji se odnose na ustroj i funkcionisanje civilne zaštite iz nadležnosti u kantonalnim tijelima uprave i kantonalnim ustanovama, općinama i pravnim osobama od značaja za Kanton i općinu, a koja se odnosi na sljedeća pitanja:

1. provođenje ovog zakona i Zakona o zaštiti, za pitanja koja su u nadležnosti Kantona i pripreme kantonalnih ministarstava i drugih tijela kantonalne uprave,
2. provođenje ovog zakona i Zakona o zaštiti za pitanja koja su u nadležnosti općina i pripreme općinskih službi za upravu,
3. pripreme u službama zaštite i spašavanja koje formira Kanton i općina,
4. mjere zaštite i spašavanja koje proizilaze iz plana zaštite Kantona i općina,
5. pripreme civilne zaštite u pravnim osobama iz člana 32. Zakona o zaštiti od značaja za Kanton i općinu,
6. izdvajanje i korištenje sredstava za financiranje civilne zaštite i skloništa,
7. obučavanje Kantonalnog i općinskih štabova civilne zaštite,
8. obučavanje Kantonalnog i općinskih operativnih centara civilne zaštite.
9. raspored ljudstva u civilnu zaštitu u Kantonu i općinama.

Poslove inspekcijskog nadzora iz stava 1. ovog člana obavljaju inspektori civilne zaštite, u skladu sa propisima o sadržaju i načinu obavljanja inspekcijskog nadzora, koji donosi direktor Federalne uprave civilne zaštite.

Uprava, u okviru svoje nadležnosti, vrši poslove inspekcijskog nadzora u oblasti zaštite od požara i vatrogastva u općinama i svim pravnim licima od značaja za Kanton i općinu, a koji obavljaju inspektori zaštite od požara i inspektori za vatrogastvo iz Uprave, u skladu sa nadležnostima iz člana 148. i 149. Zakona o zaštiti od požara i vatrogastvu.

Član 11.

Protiv prvostepenih rješenja Uprave koja su donesena na osnovu federalnog zakona ili drugog federalnog propisa, u drugom stepenu rješava Federalna uprava civilne zaštite ako federalnim zakonom nije utvrđena nadležnost drugog organa.

X – PRIJELAZNE I ZAVRŠNE ODREDBE

Član 12.

Zakon stupa na snagu osmog dana od dana objavljivanja u “Službenim novinama Zeničko-dobojskog kantona”.

Broj:01-02-11810/11
Datum, 05.05.2011.godine
Zenica

PREDSJEDAVAJUĆI

Miralem Galijašević s.r.